

江西詩徵

江西詩徵卷四十五

南城

明

胡儼

儼字若忠南昌人洪武二十四年會試乙科授華  
亭教諭永樂初擢翰林檢討同解縉等直內閣尋  
遷國子監祭酒洪熙元年加太子賓客致仕有願  
菴集

四時詞

春風吹簾斜簾開飛柳花美人高堂上見此惜年華年華  
容易隨春草一雙蛾眉鏡中老

江西詩徵

卷四十五 明七

碧水汙迴塘新荷豔曉粧看花臨綺檻愛此雙鴛鴦鴛鴦  
宛轉迴塘路相對朝朝還暮暮

秋雲白如玉梧桐墜寒綠文犀鎮錦帷紅淚銷銀燭銀燭  
輕搖翡翠烟孤影熒熒夜不眠

葉落深閨靜露零霄鶴警玉井凍無聲夢迴寒夜永夜永  
銅龍漏幽咽小窗斜轉梅花月

### 竹枝詞

湖上聞郎歌竹枝湖中蓮艇便輕移  
郎言郎度瀟湘去折得荷花空淚垂

船頭烟暝浪花飛船裏風來雨濕衣  
獨棹隨風下蓮渚迎郎不見又空歸

姑蘇

姑蘇城郭水茫茫往事流傳過客傷  
夜月人歌黃荊葉秋風夢繞白駒場  
火中烏合歸真主井底蛙猶笑子陽  
天下車書今混一繁華終古勝維揚

遠將歸

去年與郎別楊花飛白雪今年候郎歸  
楊柳綠依依聞郎買船下湘渚日日門前望  
行人過盡乳鴉啼徘徊日暮空延佇攬衣回  
洞房對鏡卸新妝那知清漏短但愛明月  
光月光照席涼於水帳裏燈花撒紅蕊  
好事從來不浪傳明日升堂拜姑喜

村居秋興

草蟲階下鳴夜久猶未歇掩卷坐閱寥秋聲振林樾人生  
知幾何憂來不可輟風吹浮雲開送我半窗月迢迢步前  
庭孤螢自明滅

布政孟公朝京還同閫憲諸公相過出楊少傅勉仁  
所寄詩賦此謝答

囊中孤桐琴負病久不彈玉軫映金徽徒絙朱絲絃成連  
去不返烟霧迷海山山水久寂寞諒彼知音難陽春固寡  
和別鶴亦辛酸迢迢牽牛星相望一水間

驟暑

端居適煩煥策杖散幽襟逍遙池上行愛此嘉樹林游鱗  
泳微波黃鳥邁好音遙睇高原綠欣然諧夙心疎雨忽飄

灑浮雲生夕陰坐來屏明燭空對窗間琴陶然卽枕席焉  
知古與今

暑雨過晚涼蟬聲落葉宛有秋意

時雨陰復霽漸覺暑氣消野色將欲秋蟬聲迴蕭條白髮  
非故吾黃葉下今朝老懷空浩蕩往事若驚飈

涼夜理琴

涼颼驅浮雲萬里天一碧遠響振寥廓林木聲撼撼開軒  
散幽襟坐延月華白抽琴理故曲操弄輒間格山水有遺  
音悵然心不懌齋宮接清宴俯仰思宿昔矯首望鈞天泣  
然淚沾臆

題畫

聞道稽山好千巖秀色分樹連秦望雨帆入鏡湖雲高臥  
畱安石能書憶右軍崇虛猶似昔還可問鷺羣

題陳宗淵畫

瀑布落雲端松杉六月寒携琴曾有約涉澗不辭難野水  
無人渡青山獨坐看此中多逸興投老擬盤桓

舟中雜詠用杜子美秦州詩韻

運際千年盛恩承一櫂歸不才孤世望報國念身微東去  
河流急南來樹影稀休文多病後不覺減腰圍

路逐淮南去人從薊北回青山看漸近白鳥過還來候吏  
依沙立征帆背月開誰家烟霧裏風笛弄清哀

楚州英傑地客路短長亭河水奔流濁淮山隔岸青高歌

欄白雲行李隱華星卻喜耕農足牛羊散滿荆  
妻妾漁唱晚歷歷雁聲低澤國遙通海湖田半是泥帆懸  
風正北山迥日沈西萬里同烟火無人事鼓鼙

感秋

雨脚疎還密雲頭暝復開殘蟬辭夏去一雁送秋來白髮  
人空老青雲心已灰閨中刀尺冷砧杵又相催

雨雪偶書

碧樹西風動虛堂暑氣收砧聲孤枕雨蛩響一庭秋挂席  
江湖遠忘言簡冊休豐年多樂事擊壤遍林邱

秋興

西風吹雨過江郭迥清幽不歎交游少喜聞禾稼收暗蛩



莎草暮殘蝶豆花秋野服心如水蕭條老一邱  
水天同一碧秋色淨江山歸燕翩翩急浮鷗箇箇閒虛懷  
游物外隨分在人間却笑樓船客如何去不還

坡南草堂

草堂新築海東頭占得坡南景物幽桑葉遮門春雨暗豆  
花垂遲夕陽秋角巾醉後騎黃犢拄杖閑來看白鷗却憶  
昔年遊覽處芙蓉兩岸照行舟

草堂卽事

詞垣兼秩日從容扈從重來又涉東懶性喜逢人事少不  
才虛負聖恩濃夜窗時聽金門漏曉枕頻驚海印鐘誰謂  
元龍多意氣空將短髯拂髯鬆

風捲寒雲陰復晴  
樹頭烏鵲聚還驚  
卜居未得親王翰  
掌故空憐老伏生  
塵盡閒庭人迹少  
茶香虛室客懷清  
近來物累都消遣  
何待幽棲不用名

村居卽事

天上歸來葺敝廬  
買松移竹事幽居  
喜從鄰里團新社  
得教兒孫讀舊書  
芳草池塘清漲溢  
落花門巷綠陰初  
莫言疎傳金都盡  
頗似顏含樂有餘

琴清軒

斑簾半掩爐烟綠  
時有涼風灑修竹  
明窗石几絕流塵  
橫琴試鼓瀟湘曲  
瀟湘水雲連洞庭  
木葉微脫秋冥冥  
東皇司命迎帝子  
赤豹文狸趨百靈  
改絃轉奏淒涼調  
楚聲激

烈軍心悄拔劍悲歌顧美人霸王力盡英雄勦須臾翻出  
離騷經孤臣孽子難爲情玉鸞啾啾翔廣漠雲霓冉冉從  
遐征佩蘭白雪相間作座中百斛驪珠落風雷奇氣變軒  
昂六丁髣髴搜天荒牧犢哀吟雙雉語七絃颯颯飛山雨  
莊周蝶夢漆園深芳草落花何栩栩誰知獨有秋鴻譜寫  
出清和并淒楚幾回剪燭夜中彈恍疑舟泊黃蘆渚我生  
不省絲簧音奉親高堂唯鼓琴高堂一夕萱花老落月烏  
啼愁思深烏啼月落銀河影碧玉疎星光耿耿抱琴悵悵  
發孤吟梧桐露寒滴金井

萬竹軒爲胡員外賦

高軒亭亭蔭修竹萬箇琅玕翠如束紅塵一點不飛來日

暖晴煙散虛谷谷中風動四山鳴耳邊颯颯生秋聲綠陰  
滿地收不起秀色倚窗寒更清石牀碧几淨如許拂拭孤  
桐汎商羽蛟龍舞落蒼梧雲鷓鴣啼破瀟湘雨自從作官  
登曲臺林間一一生錦苔苔深落葉無人掃白石清泉爲  
誰好幾回飛夢到家山騎得青鸞月下還覺來滿眼失蒼  
翠空遺翠佩聲珊珊

寒夜吟

金壺水澁銅龍咽百尺樓頭上新月一陣霜風入戶來紛  
紛吹轉牆陰雪曲屏坐擁紅地氍毹沈水烟清浮睡鳬錦衾  
不暖客窗夢可憐夜半聞啼鳥鳥啼夜永孤寒思淒淒竹  
影搖寒翠家在江南過鴈稀憑誰爲寄平安字

題王孟端墨竹爲鄒侍講賦

堂前颯颯秋氣高王郎醉脫宮錦袍銅盤和露墨花墜寫  
出江南金錯刀錯刀紛披風雨急瀟碧都含煙霧濕翡翠  
飛來楚客酣鷓鴣啼斷湘娥泣一雙琅玕千尺強空山歲  
晏饒冰霜傍有孫枝亦垂實會看翩翩儀鳳鳳素菴無塵  
絕蕭灑幽居如在青林下興到高歌淇澳篇閑來擬結山  
陽社更馴蒼苔三逕開拄杖時時好客來顛狂却笑劉伶  
鍾爛漫時傾阮籍杯綠陰棋罷還誇敵綵筆詩成不待催  
幾回夢繞青原麓白鷺洲前看蒼玉夢回花映玉堂清忽  
對畫圖洗心目何因置我綠綯琴爲公一彈風滿林

題王晉卿江山歸棹圖

都尉平生志高潔書畫流傳兩清絕此圖點染出天機萬  
壑千峰生夕霏秋江浪白秋風急碧樹依微空翠濕北渚  
沙寒霜雁稀西巖煙暝歸舟集山人何如栗里翁松間石  
上晚相從悠然笑別東林去溪外猶聞精舍鐘看圖不覺  
幽興發滿眼秋光動林樾會須努力盡王事他年歸泛東  
湖月

題竹鶴圖爲金學士賦

吾聞畫鶴貴寫神此圖貌得青田真琅玕森森灑蒼雪縞  
衣皎皎離紅塵露下疎林涼影薄一聲清唳穿寥廓高人  
枕簟小窗幽彷彿夢回驚月落高人自是仙之徒日揮綵  
毫坐蓬壺玉堂畫永松篁靜時聞白鶴聲相呼歸來愛鶴

玩瀟碧虛空秋生風淅淅飄然便欲挾坡仙相與翱翔遊  
赤壁我昔桐溪結竹亭養鶴曾讀浮邱經仙都九老今寂  
寞對此白髮徒星星

晚涼步月

綠槐初著花芙蓉葉已飛雙燕引雛急相將辭我歸伏暑  
困如酒涼風忽吹衣疎星散寥廓明月照書幃芭蕉窗下  
流螢入牽牛蔓上莎雞泣八荒蕩蕩清無塵獨望天河月  
中立

聞絡緯

白露下銀牀梧桐一葉黃月華冷如水枕簟爭凝霜西家  
籬上絲瓜密夜深絡緯聲聲急今年多雨蠶薄收窗下寒

機不成織

天柱岡

當天削出芙蓉青雲中一柱屹不傾蒼然不改太古色直  
與華岳爭崢嶸紫虛真人有琳館琪樹千章花纂纂青鸞  
飛下絳桃開白鹿鳴時瑤草短真人飛佩夜降臨火鈴撒  
地流紅金赤松吹笙白虎嘯玉斧鼓瑟蒼龍吟颯颯清風  
動林藪月光如水山靈走麻姑忽報王母來笑把瑤漿斟  
北斗羣仙高會良難遇我醉欲眠呼不去滿身祇覺露華  
涼山鳥初啼谷將曙歸來人世幾星霜竊祿空慚兩鬢蒼  
何時騎得遼東鶴還向江頭問故鄉

寓思



紅槿花開秋葉飛青山日落蟬聲悲美人娟娟隔河漢玉  
佩明璫將遺誰別來歲久音塵絕徒有相思寄明月明月  
照人不照心海枯石爛思轉深抱琴欲鼓無人聽掩抑冰  
絃直到今

過太白山謁遺像

古墓荒涼半野蒿丹青遺像識英豪當時唯有江心月曾  
照仙人舊錦袍

過白溝河

往事悠悠逐逝波幾多英傑此經過征驂斜日西風裏猶  
聽行人說界河

桐溪詠

一  
夜溪風萬壑哀幾多黃葉覆蒼苔等閒只有寒梅樹冷  
蕊疎花獨自開

曉過穀城黃石公廟

月落青山露氣清山頭黃石立崢嶸蕭條古廟無燈火惟  
有西風落木聲

題畫

故園西畔是西山萬壑千巖翠黛環今日看圖隔煙水西  
風吹夢繞松關

重過揚州

百丈牽江夜未休那知夢裏過揚州春風二月蕃釐觀不  
爲瓊花一少畱

棹歌

一灣一灣復一灣  
河流百折苦迴環  
歸舟盡日此中去  
只見黃蘆不見山

題師侍郎畫

遙看瀑布落寒青  
野服烏巾自在行  
好似匡廬讀書處  
滿林紅葉夜猿聲

直閣卽事

清曉朝回祕閣重  
坐看宮樹露華濃  
綠窗朱戶圖書滿  
人在蓬萊第一峰

何澄

澄字源清號舸齋  
新城人洪武二十六年鄉舉博

學能文篤孝義營置義宅義莊以贍宗族官福寧  
教諭陞海康丞與修永樂大典歷禮科給事主福  
建鄉試卒著有易經直指舸齋集

題西園隱居

曲徑深林綠水涯詩書耕鑿任年華雨餘陌上看新翠風  
過堦前掃落花興到竹陰時得句客來石鼎旋烹茶江城  
多少豪門樂曾似西園處士家

河東晚望

滿山黃葉海門秋一片嵐光帶碧流爽浦樵歸煙火起隔  
江漁罷釣緝收青年領薦陳三策白首榮恩守一邱拄杖  
看雲情未已團團華月出東頭

陳誠

誠字子魯吉水人洪武二十七年進士累官布政司叅政三使西番不辱命洪熙中告歸有西域志竹山集

題荆林別墅

舊住前村歲月深新營別墅向荆林烟霞泉石耽佳趣第宅田園遂夙心書好但畱兒輩讀酒香剛得故人斟輞川盤谷俱陳迹畱取清名照古今

梁潛

潛字用之泰和人謫子洪武二十九年鄉舉授蒼溪訓導永樂初召修憲錄陞翰林修撰歷右春坊

右贊善帝北狩監國中讎死有泊菴集

秋陰

寒雲將遠空葉落與飛鴻漢苑秦陵外淒涼是此中

早過梅岡題雲林圖

乘夕泛修渚候旦登崇岡欹坂翳雲樹側逕披風篁澗迴  
飛澗淙谷轉晨景藏絢霞浦蓮粲浥露汀蘭芳境迴素情  
暢慮遺幽意長遂與高人覲益慨官鞅羈層構抱清曠周  
覽超遐荒並轡驂安期聯軫招綺黃縱步掇瑤葩高咏斟  
瓊漿彷彿元圃陰窈窕丹邱陽願言謝簪紱因之俱翱翔  
古松流泉圖爲學生楊公作

絕壁何嵒巖下有太古松飛泉漱其根交柯凌蒼穹颯然

雲氣合往往藏蛟龍千里起暝色萬壑來長風何當采茯苓服之形神充五粒如可種千歲當還童

挽蕭處士

石火與電影著日無留光人生亦如此念之良足傷我幾三尺墳神沒形亦藏東風吹草綠草色何茫茫返景不下燭泉臺夜何長我有雙明珠掇贈何由將

漁父辭劍圖爲胡學士題

日落昭關暮煙紫東吳望中一千里江濤怒潮如雪山我無羽翼高飛難感君意氣一何頓却渡洪波風正怒腰間寶劍不能言解贈向君肝膽露丈夫相遇心相知傾情倒意何所疑窮途倉皇足悲慨此去道路猶險巇水有蛟龍

山有虎知爾千愁復萬苦還君寶劍慎周防荆門路斷魂  
茫茫

秋夜曲

月落河斜漏聲澁美人猶在閒階立陡覺風來羅袖寒滿  
池涼露荷花溼

鵝黃短襖紫羅裳紫繡盤囊蘇合香深夜倚簾愁不寐池  
頭忽見睡鴛鴦

蛙居閑述

藥圃斜通石逕柳塘淺築沙堤漁唱有時門外鶯聲只在  
林西

三月十七日送駕出德勝門



煌煌旄鉞發平明萬里河山錦繡迎王氣浮天隨寶纛虹  
光拂地護龍旌玉關指日看歸馬青海無波待洗兵萬姓  
歡呼傳捷報六軍歌舞入瑤京

合州寫懷

忘却儒官冷誰爲蜀道吟一身猶長物萬事豈關心水鳥  
窺魚立山雲帶雨沈人生聊適意莫受旅愁侵  
水合交層浪峯迴出翠環雲隨村艇去鷗趁汰波還斗酒  
相忘甚寸心如此閑不應篷底醉過却釣魚山

咸陽懷古

咸陽古帝宅雉堞何崔巍積石隱雪色金闕雲中開咸陽  
昔日稱百二兩谷維鳴客如霧秦王按劍叱風雷天下諸

侯盡西顧三戶蕭條易水空齊歌趙舞入秦宮龍旂五丈  
金樓下鳳吹千門馳道中璇霄閣道通天極仙掌芙蓉正  
相直月過文窗寶扇移星臨繡戶粧奩密繡戶文窗拂采  
霞黃山翠影繞宮斜王孫挾彈雕臺樹遊女回舟綠岸花  
岸花蹙繡連阡陌十萬朱門色相射玉檢登封貺岳靈金  
爐鑄冷銷鋒鏑風馳萬國奉威聲四夷惕息敢橫行金湯  
千里扶王業猶遣將軍北築城可惜繁華不知極三十六  
年如一日樓船童女望蓬萊玉琢軒窗五雲色童女成仙  
去不歸咸陽古堞空崔嵬黃雲捲雪城頭路城下行人歎  
落暉

述懷呈瀏陽邑教周貞

茅屋過疎雨靜夜聞江聲倦來不成寐惆悵萬里行更聞  
燭屢換酒濁盃復傾偶然歡洽好遂忘羈旅情天明出門  
去還望南山清

梁 混

混字本之泰和人潛弟天性至孝幼嗜學貫通經  
史官魯府紀善著有坦菴集

賦雁塔晴雲贈袁叔異

崇頂麗層霄飛軒瞰遐曠始登懷頗暢稍覽情初暢澄江  
一線開武姥雙鬟向神京鬱迢迢佳氣遙相望矯矯丹鳳  
雛整翮青雲上鼓笈學已優服命年幾壯高名從此題臨  
別毋惆悵

賦龍洲神彩贈別

龍洲何迢迢，逶迤亘長天。神物不可攀，五采爛且鮮。沙迴被繁草，水積橫孤煙。君侯昔遊衍，綺羅耀通川。清商激金奏，屢舞紛瓊筵。賓從俱才雄，詞賦累成編。佳賞君不見，餘韻人猶傳。茲晨餞行邁，感慨情弗宣。中觴起交壽，相愛各贈言。匪勉企前烈，忠義良所先。

永思堂

羈禽戀蓬蒿，離人夢鄉閭。引睇西北雲，中心增鬱紆。桑梓日以遠，歲月日以徂。顧茲在萬里，能不懷歸歟。邱壠莽沙草，况復春露濡。筋力老且衰，鬢髮日已疎。所幸羈旅間，而與骨肉俱。我簪苟遑遂，迴轂良易驅。毋用徒自傷，加餐保

君軀

西翠山房

層軒抗西岑積翠亘千尺  
蘭苔春煙霏松檜秋霧滴  
蒼蒼侵緹帷浮浮絢細帙  
旭景麗崖紺晴嵐帶林碧  
仰窺白馬度俯瞰黃猿躑  
尚書欣重過博士亦屢卽  
縈塗入竹尋危磴澗蘿陟  
投策良少休傾壺聊共適  
素袍凝黛光錦袂生藍色  
佳境恣消搖清時幸優逸  
東山始沾名綠野匪潛跡  
但茲寡塵紛高風孰能匹

秋夜有懷

碧樹生寒早虛窗貯月深  
鳴蛩先近枕驚鳥數移林  
蒨接懷雙壁囊空耻一金  
不眠清夜永勞想爲知心

遊尊勝寺簡略師

四境人烟迴禪宮一逕遙架橋通窈窕飛閣歷嵒堯日暮  
黃雲合秋高碧樹凋違公眞靜者塵外數相招

挽陳海桑

鄉邑推名教先生屬典刑道承前烈矩學殖後昆型立志  
希濂洛研精續考亭源傾趨峽水色煥麗天星寵召辭丹  
陛休歸掩素局罷吟司馬賦閑授伏生經來者崇師說聞  
之慕德聲科場三較藝彝鼎屢徵銘鈎贖仍忘倦張皇亦  
罕停渥殊遭聖代福侑亨遐齡會侍春風座嘗陪暮雪庭  
徒勤瞻北斗未護徒南溟晚辱招呼數時欣候問寧直期  
姻好在詎意考終丁和氣奚由接嘉言豈復聆芝蘭空雨

江口言律 卷四 五  
露桃李自郊坰遺帙棲芸閣殘詩寄紙屏居人悲哽咽過  
客走伶俜行不虧家乘名應托汗青心喪古有制援筆涕  
交零

柬彭叔介

彭君孝友聞閭里困辱誅求已半生揮筆自憐鵝可換  
琴長作鳳來鳴池邊亭館邀人坐郭外桑麻仰子耕祇爲  
家貧親羸老不將文采侍承明

迎祥觀

石逕雲深長綠苔仙家樓觀絕纖埃空庭盡日無人到山  
鳥窺簷時下來

候 炯

炯字啓明南豐人洪武二十七年鄉舉以御史左遷連江令浚九井修道路吏服而民懷之歷陝西僉事卒於官

題石仙巖

茲山何鴻濛老石立積鐵懸崖見樓閣髣髴白玉闕紫微高棟當青霄羣仙絳節中天朝翩翩歸鶴夜飛舞道人鐵笛風蕭蕭我愛楊丁二僊客開軒坐我松風側醉眠巖底衾枕寒涼月娟娟竹間白

尹昌隆

昌隆字彥謙泰和人洪武三十年進士廷對第二授修撰改監察御史建文初以直言斥知福寧縣



永樂中歷禮部主事爲呂震所誣族誅有集

送孟潛楊先生教授

理權辭京都之官越閩嶺樵峯渺何許川涂邈修迥霜雪  
歲暮繁朔風吹樹冷嚴程旣難滯別意當自領清波漾寒  
色孤帆明夕景已過落星灣遠望杉關境橫經守清秩郡  
教知獨秉遐想諸生徒三席待開省

永思堂

堂上雙親痛久違音容無復見當時百年未遂生前養千  
古難忘沒後思霜月海天華表鶴夜窗燈火蓼莪詩水流  
到海有時竭此恨終天無絕期

臨清軒

重構新亭繼往賢  
朱甍仍瞰綠池邊  
臨堦倒浸天心月  
遶檻潛通谷口泉  
山色雨餘侵玉笋  
波光晝靜映青編  
今朝試倚闌干立  
佳致依然似昔年

梅岡王氏竹所

幽居種竹久成林  
三逕梅香晚色深  
千畝月明看鶴舞  
萬竿秋老聽龍吟  
蕭森繞舍清霄響  
蒼翠當軒白日陰  
盡說子猷多逸興  
想應林下有知音

臨刑血詩

吾今四十九年春  
豈料奸權害此身  
虎穴定爲冤死鬼  
羅窗空作讀書人  
妻兒那忍肝腸斷  
兄弟難忘骨肉親  
寄與家庭諸長者  
吾今有屈屈難伸

題梅

孤根稟純陽一朶一太極紛紛詠梅人此趣誰能識

題灌溪歸隱圖

松下樓臺溪上山故鄉是處有柴關何時得遂歸田願杖屨追隨日往還

金陵送別詩

爲子濟弟書

京國匆匆始合懽鄉關遠隔萬重山連牀未穩西堂夢又棹扁舟弄月還

鄔修

修字存誠南昌人洪武三十年進士歷官太平知府

中秋分韻

秋月已成規  
秋闈猶列戟  
妙契結金蘭  
今夕是何夕  
時序有代謝  
情懷增感激  
對酒發新吟  
此樂良難極

一李耕

耕字原埜  
貴溪人  
洪武中進士  
六歲能詩  
十歲通羣經  
宋景濂蔡淵仲皆稱爲一代奇才  
官仁和令

八月而卒

龍巖

此龍何事老巖阿  
不與商家殺旱魔  
曾到西天吞世界  
如今滿口是彌陀

周是修

是修名德以字行泰和人洪武中舉明經由霍邱  
訓導歷周府紀善尋改衡府畱京師與翰林纂修  
靖難兵起上書指斥用事諸臣京城失守入應天  
府學自經死有薊藁集

一壺酒歌

一壺之酒三四客閤煖爐紅窗月白圍爐把酒但飲之須  
臾相顧皆春色酒亦何美意亦何長人生百年內嘉會不  
可常且樂今夕同徜徉飛霜落盡衡陽樹哀鴻叫下瀟湘  
浦瀟湘浦九疑雲隔蒼梧路帝子香魂招不來空餘竹上  
啼痕處放歌一曲壯心悲天涯漂泊我何爲明當徑度禾  
川水邨望廬陵山翠歸

牧童謠

遠牧牛朝出東溪溪上頭溪頭草短牛不住直過水南芳  
草洲脫衣渡水隨牛去黃蘆颭颭風和雨老鴉亂啼野羊  
走絕谷無人驚四顧寒藤枯木暮山蒼同伴相呼歸又忙  
石稜割腳茅割耳身上無有乾衣裳却思昨日西邊好曠  
坂平原盡豐草短蓑一臥午風輕長笛三吹夕陽早

梅桃源

山行五六里峰勢忽亂巉前有梅桃源人煙帶邱隴大寒  
雲木交晝晦風水湧近聞豺虎多深入能弗恐

釣魚臺

仙人何代飛空有垂綸所危磯枕中澤形勝猶太古奔流

怒出峽衆巘欣承宇悵望嚴子陵山秋紫蘿雨

鷓鴣港

十家同一姓浮處依巨港取魚以爲活鷓鴣代畧網田園  
世外疎兒孫眼前長何當命輕舫煙波共長往

白水湖

平湖淨如練光氣日舒卷秋水荷花鮮西風棹歌遠美人  
居上頭遊子無時返行見紫鴛鴦惆悵天涯晚

華蓋山

東風吹大河河水爲上湧緬思華蓋君巢雲絕塵冗陰時  
月滿軒耕處雲生隴何當命巾車相從服鉛汞

花陵渡

路窮春江長江上花陵渡東風桃李花多少隨流去野航  
容數客來往衝紅雨日夕望煙波武陵更何處

武婆圖

處女桃花顏自幼謝塵匹飄然入茲山燒丹學仙術乘雲  
以何代畱名至今日徒令凡世人千秋指遺跡

黃衣巖

崇峯出百里岩壁一何峭神功肇元氣中有太古竅青雲  
從下起白日當前照仙鶴不重來年年野花笑

太平洲

一水分復合是有中流渚湖洄從其人道阻心良苦美人  
美如玉遠世甘獨處秋風把釣歸遠屋松蘿雨



尖心峯

東郡富原田西顧曠平永青峯特中起卓立勢拔笋造化  
固根芟陰陽定標準何當躡層雲臨覽至絕頂

大石門

兩山夾長溪石壁忽觚截一竅正中開巔岬象棖闢不假  
造化功世人焉得設萬古祇如斯消磨幾行客

白下縣

大河東遙遙孤城忽如塊臨流起層閣危軒俯長瀨西山  
常倚晴宛若蛾眉對日夕望闕都車馬空橫潰

禾川歌送郭愉

禾川之水流東海浩浩蕩蕩千萬載英雄眼底今安在衰

草連天古城壞昔日樓臺歌舞園今朝牧馬成荒塞廢興  
如此不足論空使愁人容髮改君今別我歸禾川禾川之  
水應依然銀屏石下買春酒畫角洲頭移晚船高堂侍養  
有慈母慎勿蹉跎事羈旅江山遙遙道路阻嗚呼別君汨  
如雨

望武山佑仙觀

天上神仙府人間道德門水分千澗遠山拱一州尊松鶴  
忘寒暑雷龍警旦昏何時登絕頂瀟灑望乾坤

秋日贈別西溪故友

一劍南遊慣山行秋始涼草枯泉脉見樹合嶺形長去馬  
衝殘雨歸鴉背夕陽臨岐更何語涕淚在衣裳

山居

幽居隱薜蘿誰問夜如何風定雲昏斗星稀月渡河征鴻  
聞去遠落葉坐來多見說邊庭士防秋尚擁戈

幽居晚雨

一戶通幽徑依依敞竹門亂雲低白晝疎雨濕黃昏犬吠  
當林屋鴉歸隔水村呼兒供棗栗獨自酌芳樽

述懷

相如未得意偶然遇文君何因卽同載萬里濱西行婦德  
固已失竊貴名亦成匪爲足素願聊以慰羈情古禮重親  
迎終始猶難憑所以旣榮貴一朝聘茂陵

韓信本忠臣一心佐漢主指揮百萬師竭力定疆宇大義

重如山王封就荆楚來朝忽被縛無乃太荼苦淮陰雖可  
俟終愧虎變鼠功成不退身無恨蕭與呂

我有兩龍劍閱世三千秋堅剛出百鍊蒼色古且幽異哉  
歐冶子功與造化侔劃水蛟鱷斷指空鬼魅愁精光不可  
掩夜夜衝斗牛所恨際休明鋒芒久潛收願持獻天子爲  
斬佞臣頭

蜂蟻有君臣伎伎岩穴間肝心事其上時往時乃還一以  
勤致遠一以固守關誓不圖苟活使君罹險難物微尚如  
此人胡獨弗然嗟彼趙高徒擅國恣兇奸下視蜂蟻性何  
能無厚顏

走馬千萬里言志天一方北風振大漠白日慘精光前有

桑乾原傳是古戰場狐號雜鬼哭死骨如高岡寒雲塞關  
北沙草夢已黃云昔霍嫖姚兵氣橫秋霜長驅無敢敵親  
手斬賢王功成畫麟閣龍沙空莽蒼

黃河發西吳下決崑崙峰奔流幾萬里上與滄溟通混混  
越千載澄清明聖遂念哉昔多士禍已投其中精魂竟何  
訴事業一朝空君子貴知命胡爲罹此兇坑儒剪羸裔用  
傑興炎宗所以血未化唐祚亦隨終

朝出都城門遙望都城道道上誰家兒駿馬嘶煙草玉帶  
宮錦袍意氣凌穹昊斜過寶釵樓樓前春正早樓頭美人  
笑笑臉逾花好下馬醉紅粧芳情兩傾倒明日復明年相  
看不知老

籬落秋蟲鳴，烟火四鄰息。匡坐不笑語，悠然念羣物。春風  
昨相過，天地皆顏色。從誰降嚴霜，一朝盡摧絕。壯士起北  
邇，美人怨南國。光陰無少留，胡爲久離別。老大空歸來，相  
看兩華髮。

貧賤衆所惡，而乃士之常。束書返故園，結屋瞰清江。稍種  
門前柳，亦栽牆下桑。深居觀元運，外物徒擾攘。達人無不  
可用行，舍則藏固哉。亞父輩赤心，龍戰場劍術豈不精。奈  
何天命王。

朔風號海甸，十月雪漫漫。畫戟攢雲暗，鐵馬蹴冰寒。但願  
主恩重，寧論北伐難。漢宮抵疎勒，敵騎爭臯蘭。孤軍勢逾  
險，百戰陣仍完。殺氣無時合，兵符隱夜看。功名何足貴，所

願致君安

漢國千年固涼天萬里平那堪風雨夜夢不到咸秦漠漠  
雲山白悠悠雲雁聲令嚴鐵衣冷雄劍動光精男兒生盛  
世有身當奉君但謂奇兵出邊塵日可清何知沙漠迴白  
首未成名

窮達付天命胡宜心苦憂元穹馳兩曜羣動不能休風霜  
逼歲杪感化生遲留汲汲者誰子走馬出南州路逢徒步  
友相喚不回頭意氣可時羨功名那未收古來豪俠地惟  
見水東流

出門省時物薄言向東郊秋風入灌木百鳥爲悲號復見  
孤雲鶴唳繞長林稍傳書直達海羽翮無乃勞於鵲思一

息而奈失其曹鴟梟上翔集狼虎下咆哮飄然載高舉人  
間那可巢

海水浚不測關山高不逾君去日已遠妾在當何如風煙  
眇吳越徒此長嗟吁所願山可摧復願海可枯山摧爲平  
地海枯成坦途萬里無寸險一日可回車

登山采靈草悠悠念長生長生不可念且遂採芳行曠哉  
秦臺子雙聲調玉笙清商汎宮昊鸞鳳感和鳴倏爾凌空  
去眇若秋雲輕徒令企望者蒼然熱五情世間榮辱夢終  
古未應醒

秋夜有懷武陵舊友

片雲停西南下與山翠接寤言同心人於此三歲別道路



阻且長何時見顏色我有枯桐琴朱絃久徒設欲爲孤鸞  
操中內增永結思將持贈君千里非易越悠哉清秋夕不  
忍對明月

種樹詩

生有種樹僻性稟由孩提五歲藝菽麥幪幪輒成畦七歲  
讀書暇封殖靡他爲九歲已悟達益諳相土宜百穀暨蔬  
果根蔕口數移行年十三四把筆耽文詞朝誦彙駝傳夕  
歌生民詩始祖出姜嫄艱食肇播施奄然卽卽室德教萬  
古垂嗟哉丁未裔心好同規規欣逢堯舜君委身當恐遲  
中原遇龔遂與爾爭先馳

起晦鍾文學有詩呈國子蕭先生倚歌和贈

一從棹雪剡溪歸五載懷賢思不違耽酒每聞陶靖節看  
詩長慕謝元暉延津佩劍愁龍化洛浦吹笙想鳳飛休用  
六韜窮術數且將三易盡精微驕驍出路增時價美璞藏  
山耿夜輝桂嶺隴高魚度阻楚天雲遠鴈來稀郊居晚雨  
深蘿薜洞府秋風老蕨薇割席管寧原自負卜鄰王翰願  
相依頻年異縣傷離別何許連牀聽發揮稍待約同黃禮  
輩再隨流水覓岩扉

長安古意

長安二月三月時千門萬戶春風吹綺構瑤臺相照耀香  
車寶馬並驅馳驅馳照耀皆豪貴九棘三槐夾三市鼎食  
鐘鳴將相家朱簾綉柱王侯第王孫公子盛繁華山珍海

錯棄泥沙銀鞍斜度宮溝柳丹轂橫移御苑花花欹柳豔  
春明媚嬌鳥亂啼花雨細琉璃宮錦殿傍雲開鼙鼓龍簫震  
天起美人內屋豔神仙鉛華眩轉春爭妍燦燦珠屏交綵  
幄隱隱羅幃分玳筵蘭般桂酒芬芳發象筋瑤杯光彩徹  
翠釜金罍不暫停雕盤玉盃紛成列迴瞻複道接飛甍都  
城佳氣正氤氲雙龍絳闕凌青漢九鳳紅樓瞰紫雲紫雲  
翠霧碧雲空文窗藻檻何玲瓏流鶯獨繞昭陽殿芳草深  
迷長樂宮漢代中興宮名將百戰功成心益壯閑來賭酒  
千僕姑意氣相排不相讓半酣徑上寶釵樓赤闌四而俯  
皇州一羣粉黛成歌舞千種風流生勸酬樓前雨雨鴛鴦  
度樓下雙雙鳳鳳舉鳴璫背解玉纖輕弄色疑情羞不語

就中心思可誰同  
平明扶上玉花驄  
自言百世無衰老  
自謂千載長英雄  
可憐光景畱難住  
秋風一夕生庭樹  
歌亭寂寞荒草寒  
舞榭蕭條殘葉暮  
昨日紅顏美少年  
今朝潦倒那須數  
將軍舍外無人過  
廷尉門首堪雀羅  
吁嗟盛時不復作  
金莖銅狄隨消磨  
君不見廣成山中白雲宿  
安期海上顏如玉  
軒轅已駕鼎湖龍  
漢武終歸茂陵麓  
別來倏忽三千年  
海水幾變桑田綠

塞上曲

北風獵獵衰草黃  
塞馬壯健塞人長  
馬嘶風勁角弓響  
射斷天邊鴻雁行  
驚沙亂起愁雲變  
人馬相聞不相見  
單于夜半未歸庭  
昭君空抱琵琶怨  
淚雨濕花香滿面

塞下曲

十月祈連三尺雪孤軍萬里防狡譎鼓鉦不動馬停嘶北  
風吹凍衣裳裂元戎怒奮黃金戈夜移苦戰臨交河海雲  
漠漠關月黑道傍死骨何其多主恩未報將奈何

紫驪馬

紫驪馬黃金轡一時剪拂當晴天蹄輕耳峻筋骨堅性烈  
不受庸人牽山西主將功名老時時騎出長安道長安三  
月春風寒無限落花點芳草遙遙數里聞號鳴走過一畝  
疑流星汗生黑暈搏雲濕舉國驚駘空震驚歸來四海知  
聲價甘將伏櫪都城下回看乘旦可不慚苦月寒霜自終  
夜

莫愁樂

石城城下春江流  
城邊十二紅粉樓  
吳兒打漿動晴綠  
送妾隨君樓上頭  
爲君起趙舞爲君發齊謳  
舉酒勸君君莫愁  
妾貌強如花妾心強如月  
花盛有時衰月圓有時缺  
勸君莫惜千黃金  
趁取青春好時節  
爲樂須臾誠可憐  
人生安得長少年  
雲收雨散不終夕  
落花飛絮春風顛

漁郎謠

漁郎住在雙江口  
家養鸕鷀十八九  
唱歌打漿落長潭  
大魚上船小魚走  
四時坐臥水中央  
百藝何如網罟強  
若上拾薪岩下宿  
不識耕桑衣食足  
回頭萬事等浮萍  
雲白山青沙草綠  
短蓑開合幾晴陰  
閑來沽酒桃花林  
載歌一曲

滄浪晚棹入烟波何處尋

酒家謠

江口一樹芙蓉花花下吳姬沽酒家井頭轆轤五更響門  
前便有人來往酒味雖漓衆稱好一日常傾百壺早年來  
運去錢米缺沽酒實醇人不說門前冷落秋草生萬事蕭  
條不稱情人情反覆何能定莫怨他人由汝命朝朝江口  
望行人但見寒江白沙淨

樵夫謠

樵夫採樵樂有餘數家茅屋深林居朝朝磨斧澗底石牽  
蘿直上青山隅愛斫蒼枝桂愛伐枯死樗眼前取足隨所  
如束擔不歸就向城賣錢糴米養慈親慈親在堂乞長健

年年賣薪奉餘羨但願身安口得充  
免因賦役走西東昨日富貴千鍾祿  
今日雲南親種粟

桑婦謠

採桑婦朝朝暮暮南園路出入寧論晴與雨  
蠶盛愁桑稀蠶衰恐姑怒大眠起來忙更忙  
寢食不遑兒不顧年年養蠶多繭絲身上到頭無一縷  
小半輸官大半賣繰織未成先有主可憐寸寸手中過  
竟作何人襖衫去采盡桑葉空閒樹樹下青青長麻苧  
山雞角角終日啼桑椹漸紅春雨住妾尚無襦夫少袴  
事事令人亂心緒嗚呼人家生男復生女生男猶得傳門戶  
生女徒多累父母若兼長大嫁貧窮不似生時棄塵土  
君不聞采桑婦



瞿塘賈

瞿塘賈前年二月離鄉去去時許妾半年歸指定桃花成  
誓語桃花三度謝還開望斷天涯不見來相思未惜容顏  
老但恐君心不長好君心重利豈重情有錢何處不羈身  
黃昏花落風雨急獨掩重門愁殺人

臨川女

臨川女日日臨川望何處臨川路前月征人從此去征人  
此去九千里持戈遠赴交河戌交河沙塞宵茫茫盡是古  
人爭戰場白骨連山中夜月鐵衣倚馬五更霜此時王事  
好辛苦將軍號令嚴如虎一聲敵騎寇邊州生死向前無  
轉頭丈夫重義輕生死動肯屈驅報天子妾在深閨君在

邇何當破敵遂生還但令百歲能相見離別尋常安足怨

### 歸寧婦

門前石橋路東去何悠長妾從此路嫁他方還從此路歸  
故鄉揭來別郎五六月朝夕不離慈母傍月滿西堂夜未  
央烏啼金井梧桐黃此時與郎惜景光獨守羅幃愁斷腸  
忽向樓前聽嘶馬報郎迎妾將同行慈母許辭親爲妝膏  
車秣馬當晨霜母恩更比郎恩厚但願母壽郎安康歲歲  
與郎登母堂

### 石仲歌

前朝古墓青山陬石仲屹立經幾秋龍摧龜斷蚪折馬  
仆麟僵鸞鶴立獨爾形容得苟完無乃年深化靈物知是

誰家顯祖宗子孫零落各西東清明寒食宵不至空有狐  
兔巢其中石仲淒涼何足道金莖銅狄餘烟草怪蔓罔兩  
自爲隣雪霜滿頭天地老

柳條長

柳條長柳條長門前三尺溪水黃雨晴布穀啼欲死村中  
父老心徒忙心徒忙事難了大兒當官少兒小府縣公文  
迭迭催吏胥晨夜何紛擾雞豚殺盡無毛餘杯盤稍薄卽  
喧呼雲南逃卒計千萬星火捕獲私相圖同名共姓隨地  
有掩襲成擒不鬆手爺娘陷絕妻子離負戈萬里遙奔走  
姻鄰哀送擁道傍淚滿春衣空斷腸丁寧異境好將息畱  
取眼睛歸故鄉故鄉田土人誰種堂上雙親復誰奉皇朝

奮武誓開邊邊塵未靖兵猶用高歌一曲柳條長壯士由  
來志四方會看三箭天山定從此化爲侯與王聚散尋常  
安足傷

種粟謠

鄭州民稠田不足生計家家只耕陸歲饑麻豆不堪充小  
戶年來多種粟粟苗幪幪過人長粟葉青青粟穗黃老妻  
稚子欣欣喜晚摘成筐夜舂米入廚炊飯滑且香自說無  
如種粟強鄉村米價日騰湧我粟如茨被邱隴世間百事  
總艱辛到底勤耕不悞人

蔣氏山莊納涼

綠樹繞方塘平橋水氣涼波明金鯉動石淨錦苔香把酒

忘鄉遠看棋愛日長此中眞自好何必泛滄浪

次韻龍維丹金陵出塞

君不見上國都門道如砥九棘三槐夾三市又不見金戈  
鐵馬陣雲浮拜命安邊辭玉樓車聲夾營若雷動絃管咽  
啾發伶從中天月色鐵衣明半夜霜花隼旂凍漠南塞北  
無王庭蛇豕縱兇何足平況今天子能得士百萬驍騰皆  
俊英鳳闕龍城分虎衛武備頻年百精銳闔外同推太尉  
賢府中只數元戎貴鍾山走勢橫千霜金陵佳氣成九章  
運籌帷幄佐明主似有漢代韓張良羽書昨日徵邊戍百  
里旌旂蔽烟渚雄心一片獨飛揚要斬樓蘭滅颶風賀蘭  
山下寂無人龍鱗水上直孤軍丈夫生死向前去豈復回

頭懷所親錦機設織回文字離情不奪英雄志會須三節  
定天山青史功臣當殺梓黃塵大漠渺茫茫却望君門天  
一方邊庭早晚應奏捷獻凱歸來朝未央

青山高

青山高白雲深君不來傷我心青山高白雲長君不來斷  
我腸斷我腸在何許洞庭之下瀟湘浦昨夜瑤琴一曲中  
輾轉離鸞爲君苦復對青山歌白雲千里萬里遙思君遙  
思君君不知遙思君無已時青山自青雲自白天地悠悠  
自南北

畫龍歌

雲如車輪風如馬雷鼓砰訇電旗參其中踴躍何爾爲無

乃蜿蜒作霖者古來善畫此者誰葉翁所貌稱最奇筆端  
揮灑絕相似亦有風雲雷電隨大梁徐公生卓犖十上引  
錐稱好學揮毫洒墨運天機鬼泣神愁日光薄斯須縞素  
騰真龍莽蒼直奪造化工恍如列缺引霹靂歛若翼二驅  
豐隆枯木槎牙頭角露鱗拂雪花駭成怒劃然威掣海門  
閑徑望層空欲飛去我時見畫心膽豪拔劍起舞翻絨袍  
波濤萬頃東溟濶瘴烟千丈南衡高嗟哉徐公天相爾後  
恐無繼前無比酒酣神氣益洒然白日風雲衙戶起爲君  
一作畫龍歌高風激烈雲臺我魚蝦混處不可久龍兮龍  
兮奈爾何

王氏江居席上醉歌行

王君家住河上頭，河水八月清瀏瀏。  
西風入林竹，屋冷蟬鳥雜鳴。  
嫌不幽，生平於我交最密。  
巖然膠漆深相投，君常慕作泉石隱。  
我亦好爲山澤遊，別來未久若數載。  
一見輒復苦死留，進我玉壺之芳醪。  
饌我璧盤之珍羞，小兒進蔬果。  
大兒參獻酬，况有白髮親。  
諧謔相綢繆，於此不醉將何求。  
日高豪飲達半夜，中天片月清輝流。  
銀河明滅北斗轉，繁露欲墜茅烟收。  
是時杯行已不記，但覺淋漓雲錦裘。  
庾亮南樓非足擬，山簡習池安得儔。  
君不見金谷園，亂鴉芳草黃昏後。  
綠珠紅粉千年愁，又不見朱雀門。  
霜戈鐵馬坐無敵，擒虎英雄今亦休。  
不須富貴勞所志，且飲百斛寬煩憂。

憂



短歌行寄宗元蕭文學

憶昔北尋馬子洞二月風雨三冬寒乘舟濟川浪洶洶驅  
車遵陸泥盤盤挹君豪名振海甸走過山陰識君面燕領  
虬髯熊豹姿當時令我喜欲旋吁嗟交道無早晚誼合斯  
須傾肺膽翟公何著死生情阮藉徒爲青白眼金樽有酒  
池有魚魚肥可膾酒可斟張燈促宴諧終夜紅燼照室光  
相射中有萬斛江南春綺裘瑤席香薰人風流文彩稀今  
古下筆雄詞躍蛟虎千金難買一朝閑况是賢材兩賓主  
石林月黑子規啼我已醉眠無所知夢覺雞鳴滿庭樹起  
望鄉國生離思別來匆匆歲華改歌樓舞榭移光彩夕陽  
芳草落花時獨立平原闊如海問如海長思君何時重與

鄉論文古來聚散有如此還望青山歌白雲

早還鄉行

長安城南官道傍行人車馬何彭彭  
行人意氣何軒昂雕鞍繡轂搖琳琅  
錦袍玉帶生輝光健奴咆哮如虎狼  
報酬賈勇百不當短鎗長劍誇兇強  
疾賢不學魯臧倉持槌肯隨漢張良  
美妾娉婷雙鳳凰綺羅珠翠嬌殊妝  
春風列座宴華堂吳歌楚舞勸清觴  
雪膚花貌斷人腸結交豪俠輕侯王  
忽忽四海英聲揚天子召見入長楊  
勅以紫綬懸金章與朕連兵平北方  
北方萬里天茫茫嚴冬十月皆雪霜  
鷺鳥不飛馬傍徨承恩受服心惶惶  
驅車三日抵漁陽陽鼓振大荒分營遣將兵  
符藏玉關祈連尚我疆黑山

青海勞隄防夜隨烽火赴沙場沙場轉戰夜未央彗星當  
夕收精芒匈奴殺戮犬與羊血流漂杵屍成岡傳道單于  
先買降幕南塞北就平襄獻凱歸來朝建章建章春雨花  
煌煌寵恩慰勞不可當功與韓彭相頡頏名同衛霍參翱翔  
出入謀謨資廟廊天下之人誰敢望只今老大鬢欲蒼  
故山海角路遙長便辭明主趣歸裝直指衡岳逾瀟湘公  
卿禮餞塞河梁簫鼓哀吟心思傷但覺雙輪起鏘鏘是時  
九月天氣涼西風拂拂吹衣裳鴻雁南飛亦悽愴我不如  
之爲稍梁誓尋三徑隱幽莊竹籬茅屋依山牆環堵樹之  
千樹桑子孫世計斯爲臧秋露溥溥時菊芳黃雞肥來新  
酒香醉歌一曲臨滄浪向之富貴今已忘豈知萬國如虜

唐功成不退終致殃丈夫有志固直量川能與世掃粃糠  
萬鍾之祿那保常不如謝官早還鄉

和劉輝遠短歌行

閉門風雨鶯花老紅紫園林淨如掃晴來點檢江南春一  
碧連天有芳草美人不見余心悲參辰出沒長睽離睽離  
咫尺若萬里竟日悠悠勞所思琥珀鵝黃金錯落徒負高  
情同畢卓安得蒲萄變漢江便築糟臺齊華嶽美人何時  
對青眼北樹東雲愁復晚雕鞍寶馬洛陽兒瓊筵綺席新  
豐館朝回九重鳴玉珂夕飲百斛雙顏酡青雲亦欲致身  
早其若神龍淺水何嫩人胡爲在邱壑緼袍不換朱衣著  
固知藏器以待時豈比尋常空落魄讀書勝遺滿籬金誰

識韋家祖父心相思相望莫相及修竹繞門流水深

送胡立峯大叔遊山東

春江雨漲七尺濤拖樓飭駕聲嘈嘈丈夫立志在遠大所  
舉卓越非徒勞高莫高兮九千仞之匡廬五老秀色分香  
爐左蠡揚瀾日震盪嵐煙瀑水迷空虛深莫深兮沈竿續  
蔓難測之小孤西滙旣滯彭蠡湖晦明瀕洞混一氣倏忽  
津涯知有無直下山東二百州名山大澤紛相繆郊齊控  
魯屬吳楚古來豪傑多封侯生平曠達由天性但分何方  
有形勝呼奴牽却五花馬市作行裝卽無吝腰間只佩蒼  
精龍拔出赤電驚雷風酒酣歌罷復起舞臉暈欲奪桃花  
紅桃花正紅春雨晴芳草滿園啼早鶯前鼓聲停棹歌發

又似前年春二月前年歸是去年冬今年歸是何時節白  
鷺洲邊楊柳煙還鄉好見柳依然莫言不折長條贈留取  
歸時穩繫船

古從軍行

金鼓龍城出旗旄虎衛分築壇新拜將飛簡急行軍關路  
晴和雪邊烽夜照雲寇兵今未滅何以報明君

萬馬不聞嘶天山雨雪時旌旗寒色慘鼓角夜聲悲漢將  
雄船出賢王敗壘移提書星火急應到鳳凰池

轉戰桑乾夜匈奴半遁逃邊烽隨鼓歇海月傍營高總笑  
採囊易誰言破竹勞指時龍闕下朝服換新袍

早發西城

城雞纔一唱促駕不言勞地轉南山近天迴北斗高宮槐  
交大道御柳夾長壕過盡樓臺影參差入野蒿

仲夏日暮憶胡筠客金臺

清風滿竹扉細汗冷絺衣蓮愛疎紅靚槐宜密翠肥野塘  
雙鳥度溪寺一僧歸之子金臺客音書何太稀

夏夜憶九成姻兄

涼灝生微月纖纖出素雲移牀噉竹影掩袂惜荷芬酒店  
沙頭靜漁燈浦口分故人隔江水何事久離羣

田家雜興

竹外三四家通江徑路斜得錢新買犢就水屢移車稚子  
晴探槭荆妻早種瓜日高初飽飯種火去燒畬

竹底徑逶迤人來犬未知天寒樵事苦雨濕飯香遲草接  
茅簷長藤穿甕牖垂老翁衣百結時邦賣蠶絲

洗竹添新笋培桑滅舊條就風鑽火易鑿地引泉遙簷掛  
新收筍池浮舊棗瓢西鄰春酒熟深夜却相招

畊樵無遠地嫁娶止比鄰山果隨歸慣溪魚入饌頻教疎  
難盡禮俗朴易居貧但祝時年好燒錢拜社神

華發連畦綠枇杷滿樹黃前簷臨澗逼後逕入山長桑柘  
肥春雨雞豚散夕陽子孫知幾世老死不離鄉

### 送友人之延平

別路三湘北離人五嶺西成行愁夜雨不寐聽晨雞絃奏  
添惆悵壺觴益慘悽江分吳地闊山界楚天低潘岳塵應



斷陶潛路豈迷河陽花發遍彭澤柳生齊籍籍征途語蕭  
蕭去馬嘶曉亭連戍壘春樹暗蠻溪岸轉楊梅落林深謝  
豹啼甌閩王化遠望爾作雲霓

再廣酬光遠文學

王國今多士君誠拔萃豪用當天下器選奪俊中髦匣寶  
塵堪拂山輝石不韜六龍攀駕遠五鳳助樓高律協嵇中  
散書工蔡綯曹誅茆居卜杜問菊隱成陶夏木陰分座春  
江色染袍洞雲隨蠟屐沙雨閣魚舫城市長收迹庭闌日  
服勞寫方諳藥性篝火費蘭膏節峻誰能屈名揚豈待褒  
周原臨眺望蔣徑入遊遨已有扶輪軾寧無詣闕臯聖朝  
恩播德汙吏忍懷饗經世文推傑開邊戰息塵參差登要

路變化逐宣毫材展空羣驥功參立極鰲稜稜豐邑劔子  
子浚郊旄治感祥麟至威凌猛獸逃共傳三益美莫破一  
言牢薦竿寒宜解裁葵暖稱羔山蒞藏華發家釀出葡萄  
管輅纔通易揚雄復廣騷池乾菱就採畦潤草從薈細鯉  
金明澗輕鷗雪點濤詞宗兼鮑謝詩祖辨韓毛亦學情尤  
固論交志敢怕別離增惻惻解后釋怱怱老鶴驚翔翥窮  
猿慘叫號終期膺歷試要不愧鉛刀

袁敬所

敬所失其名靖難後流寓常山之松嶺酒酣題詩  
繼以潑淚有江右布商見之曰此吾鄉某編修也  
掩其口不顧而去

按敬所里居科第以不可考茲據明詩綜收入

題淵明五柳圖

藜杖芒屨白布裘山中甲子自春秋呼兒檢點門前柳莫遣飛花過石頭

宿旅舍題壁

布被藜牀醉卽休蛙聲聒聒屋簷頭驚回一枕瀛洲夢碧樹啼鵑血未收